

Dia di Betico na Museo Arkeologico boluntarionan a resalta



ORANJESTAD --Dia di Betico 2014, Museo Arkeologico a conmemora Betico, door di dedica e dia aki na su boluntarionan. Betico mes a dedica su tempo y energia na su isla, su pueblo y na cultura di Aruba. Museo Arkeologico a enfoca riba e bunita trabou di su boluntarionan cu na un of otro manera ta duna un man pa asina aporta na nos herencia cultural. Diasabra dia 25 di Januari, Museo a busca activamente boluntarionan, tanto pa yuda Museo cu su actividadnan y proyectonan pa publico, como pa e proyecto specifico di ARUBA DOET. Boluntarionan hoben y adulto tabata presente pa asina conta di nan mes un experiencia di ta boluntario di Museo. Tambe CEDE Aruba tabata presente cu un booth pa asina duna bishitantenan tur informacion riba nan proyecto. Hopi cara nobo a bishita Museo e aña aki riba Dia di Betico. Den un ambiente hopi dushi nan a disfruta di e exposicion permanente y hopi a comenta cu nan tabata contento di a haya e oportunidad riba nan dia liber pa

bishita e exposicion cu a impresiona nan masha hopi. Eddy Tec a deleita publico cu musica folklorico y hasta algun boluntario a entretene bishitantenan un rato dushi cu musica bibo. E dia aki, Brigada Hubenil, boluntarionan hoben di Museo a haci e entrega di premio na e muchanan cu a gana e quiz di e programa di vacacion 2013. Nan mes a MC y entrega e bunita buknan educativo cortesia di UNOCA. Otro boluntario hoben, studiando pa- y cu

hopi potencial pa bira un sublime maestra di scol, a uza su talento pa conta un storia pa muchanan den hardin. El a laga e muchanan gosa mes-cos con cu e mes a gosa 10 aña pasa di e mesun storia, dia cu e mes a participa na un programa di vakantie di Museo. Boluntarionan hoben y adulto u na bes mas a demostra con hopi man ta yuda pa haci un miho trabou. Nan a rindi un servicio inmenso den un esfera di famia, y esaki ta loke e bishitantenan tambe a sinti riba Dia di Betico. □

